

Pader Plazi a Spescha

Autor(en): **Teobald, G.**

Objektyp: **Article**

Zeitschrift: **Il glogn : calender pil pievel romontsch**

Band (Jahr): - **(1867)**

PDF erstellt am: **30.06.2024**

Persistenter Link: <https://doi.org/10.5169/seals-881118>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Pader Plazi a Spescha.

(Biografia de prof. G. Teobald.)

La tiarra ei miu domini,
Sut quel lavurel jeu :
Igl ault e bass masirel
E tuts contrasts emblidel
En siu sein zuppau ;
Enconoschel della tiarra
L' interna construcziun
E mondel senza tema
En sia habitaziun.

Ch' auters fetschièn catscha
Sin rauba e danès
Jeu restel sco jeu sun
De tuts ils quolms patrùn.

Aschia lai il poet Novalis plidar il luvrè de minas e la madema impressiun han las scartiras de quei um fatg sin nus, ord la veta dil qual nus vulein purtar enzaconts fragments, essend el igl emprem che ha surpriu d'intercurir a descriver scientificamein las valladas sursilvanas, schegie che ses studis e sias bregias han mo paucs enconoschiu ed eunc pli pauc apprezziau, muncond a quels las forzas intellectualas e bein er' ils sentiments gienerus per comprender in tal um.

Nus spitgavan dalla buontad d'in amitg notizias pli extendidas sur la veta e la sort de Pdr. Spescha, notizias ch' el de bien cor havev' empermess, mo era quei aultstimau amitg ha fertont il Tutpussent clomau ord ina veta activa e briglianta, clomau el en quels logens supremis, nua ch' il carstgeun ha nigin interess pli per las caussas de quest mund e danunder el dat nagingà risposta sillas damondas dils carstgauns. La nunspitgada e dolorosa mort de **Caspar de Latour** ha privau nus de notizias pli exactas ed aschia stuein nus denton secontentar cun quei pauc che nus havein udiu dad auters e legiu en maunscrets schai anavos.

Plazi a Spescha ei nischius a Trun igl onn 1752 e pertgirava sco matatsch la mantanèra de siu bab, sco quei ei usit ellas montognas della Surselva. Schon da giuvenensi sentev' el in' inclinaziun de viver sillas pézzas e de ascender ils pli aults puncts ed aquistar aschia ina marvegliusa forza ed agilitad en il cuorer e seglir sur ils prezipezis ed ils tribels grepps de sia vallada nativa. Sia mumma scheva savens, ch' ei fussi bucca de sesmervegliar, ch' il matatsch seruschnassi schi bugien pils quolms entuorn, essend el nischius ell' enzena dil capricorn. Sin sias cuorsas encurev' el cristall e minerals intressants, havend siu plischer giudlunder, senza denton enconoscher quellas pli datier. Mo schon en siu giuven cor sedestadava in sentiment, lura eunc stgirs e confus, mo che schava presentir el, che quellas terlichontas caussas fussen bein pli che simpels solazs, fussen products d' in intern e bein ponderau luvrar della natira. In' idea della sontgadat e majestad della creaziun, digl uorden miraculus che regia en las aveinas della tiarra, prendeva bein possess de sia olma, mo ei era nigin

che havessi saviu dar ina direzziun positiva a ses studis affonils. — Ei gliei bucc enconoschent, co il giuven Placi ei vegnus sil patratg de seconsecrar al survetsch della Baselgia e d' entrar pli tard sco religios ella claustra de Mustér; probablamein ha giest la profund' inclinaziun de ponderar ed intercurir las caussas della natira, animau el tier quella conclusiun. Igl onn 1776, lura 24 onns, vegls, vegn el termess da ses superiors a Nossaduneun, per finir ses studis. Leu ha ina nova glisch entschiet a scolarir siu intern, anflond leu ina reha biblioteca, antiquitads, collecziuns de minerals, ed in diember de perderts e pietus umens che han dau ina solida direzziun a ses studis ed ei para de haver regiu da quei temps ella claustra de Nossaduneun in particular spirt d' uorden e de scienza, numnadamein sut l' influenza saluteivla digl avat Marian e dils PP. Udalric Rūmi e Murezi Brodhagen, umens che Spescha lauda sco ses megliers instructers. Igl onn 1782 ei el turnaus en sia claustra a Mustér, suenter haver retschert in' educaziun extraordinariamein gienerala per quels temps, per leu continuar ses studis e principalmein per eregier ina collecziun de mineralias, havend el remarcu che la cristalla ed auters minerals ch' el haveva viu a Nossaduneun, equivalessien bucca quels pli baul anflai ellas montognas della Surselva. En quort temps haveva sia collecziun fatg grons progress. Ultra de quei exercitav' el entras siu clar e penetront entelletg e sias extendidas enconoschienschas ina talla influenza, ch' in ha anflau per bien de confidar ad el l' entir' administraziun della claustra. Mo giest sias aultas qualitads han bucca muncau de destadar la squidonza e las persecuziuns ded umens, ch' eran fetg inferiors ad el. Gie, in mava schi lunsch e tschintschava dad el sco d' ina spezia d' atheists, essend che quels che circumdavan el, eran bucca capabels de tschaffar si sias ideas scientificas. Aschia fuvan ses studis naturalis ina spina els égls de glient ignoranta che, sco bein enqual eunc oz il di, tenevan tals studis per irreligijs, ne silmeins per absolutamein inutilis. Mo tallas reproschas ha Spescha mai meritau; el sez di savens, che giest sias enconoschienschas pli profundas della natira hagian manau el tiell' aduraziun della sabientscha e buontad divina e che havend el savens frequentau ils carstgeuns, hagi el empriu entras quei de carezar ed apprezzar quels. Era vesan ins ord sias scartiras, ch' el sefigieva ina regla de ademplir conscienziusamein las reglas digl uorden benedictin. Mo dall' outra vart eis ei segir ch' in spért schi clar ed illuminaus saveva nuot de pregiudezis, superstiziuns e de fanaticismus.

Era han tuttas persecuziuns bucca podiu far bandunar el la via, ch' el haveva ina gada anflau per giesta e strusch turnaus en sia patria, ei l' amur tier sias montognas e quolms sedestadada eun nova forza en siu cor. El visetta la Pazzola (denter il Reinsu ed il Reinmiez) e vesa lunsch entuorn las nundumbreivlas pézzas e vals dellas alps, co ellas sesaulzan de tuttas yards, gleiti en rietscha,

gleiti en massa, cun lur tgaus che tonschan il tschiel e cun lur vestgu alv da neiv. El enconoscheva mo ina pintga part de quellas ed ei gliei stau allura, ch' ina invincibla veglia de penetrar en quei magnific e misterius mund alpin ei s'impatronida ded el. Depli quei moment ha el sededicaeu specialmein al studi de nossas alps, visitond pli considerablas pezzas, considerond la veta primitiva dils pisturs bergamascs, per utilizar lur agilitad e segirezia el perquorer las montognas, figiend rehas collecziuns, mo quels studis eran eunc plitost plischer che serius' occupaziun. Pér cura che las ovras de grons geologs, sco il gron Haller de Bern, han anflau lur via ella tgeua zella de Spescha, ha el empriu d' enconoscher il punct, dal qual il carstgeun intelligent dei partir, per considerar cun utilidad la natira. Lura ha el renconoschiu la part veramein sientifica d' in tal studi, renconoschiu ch' ei setracteschi cheu bucca de giugs plischeivels, mo bein che las pli impurtontas domondas della renconoschientscha humana e della veta practica vegni cheu en consideraziun. Era mussavan quellas ovras ad el, che biars spirituals fussen sededicaei al studi della natira e giustificavan aschia sia inclinaziun predominanta. Ses viadis sin nos quolms havevan ussa per intent de sco el sez di, »considerar e renconoscher las ovras divinas en nossas Alps.« Il presentiment che il giuven pistur haveva viu, severificav' ussa positivamein el spért digl um madir. — Nus sesanflein el temps, el qual Spescha ha interpriu l' ascensiuu dellas pli impurtontas pézzas ella vischinonza de Mustér.

Denton er' igl onn 1799 vegnus neutier cun sias impurtontas domondas politicas e sias partidas. Spescha, per principi republicaner e democrat, simpatisava bein culs emprems e nobels moviments della revoluziun franzosa, mo mai cun sias faulzas e sanguinusas consequenzas; era ha el adina sedeclarau encunter mintga sort de intervenziun jastra, segi lura entras la Frontscha ne l' Austria; el haveva simplamein l' opiniun, ch' in duessi encurir de star neutrals, vesend bein en, che schibein l' ina sco lautra pussonza haveva mo l' intent de utilizar nossa tiarra per agien interess. Mo quella raschuneivla maniera de ver las caussas ha anflau nagin applaus tier ina populaziun en quei moment luvrada dallas passiuuns, s' exprimend el ultra de quei buce adina cun tutta precauziun, sche quintavan ins el sco appartenent tiella partida franzosa.

Mo en verdat ha Spescha priu nagina part di's moviments politics; sia mira era mo de pacificar e reconciliar. Incaricaus de negoziar cul gieneral de Mont reussescha ei ad el de render ils Franzos pli favoreivels. Pli tard, havend igl inimitg greviau la claustra de Mustér cun ina summa enorma, surdat el spontaneamein sia fetg custeivla collecziun, ultra de quei tuttas sias custeivladats per gidar de stizentar ils deivets. Mo vulend tuts sacrifezis bucca tonscher, sche ha la claustra termess el a Cuera, per negoziar

cun in inimitg insaziabels. Veramein ha el giu la ventira de far giu 20,000 fr. e de deliberar plirs de ses collegs, ch' ils Franzos levan manar en Frontscha. Per tutta recompensa ha el stoviu laguoter la remarca, ch' in vesi pér ussa, tgei Jacobiner el segi, ch' el hagi negoziau schi ventireivlamein culs Franzos.

Fertont ch' el er' occupaus cun tallas fitschentas, fuvan novs disuordens ruts or' a Mustér. Spescha serenda immediatamein ella Parttura per purtar la nova, ch' ils Austriaes segien batti, sperond de aschia puder impedir novas disgrazias, mo el arriva memia tard. Smanatschus da ses agiens compatriots, mussond ad els la nunpusseivladat d' ina resistenza encunter l' armada franzosa, ei el sforzaus de seretrer ella Lumnezia. Paucs dis pli tard arriv' el, suenter esser mitschus da melli prigels, a Mustér, mo el anfla leu mo las eunc fimontas ruinas della claustra e dil vitg. Tut quei ch' el haveva possediù e quei che contristav' el il pli fetg, ses cudischs e sias scartiras, er' uss' u engulau u barschau. Spescha tuorna puspei en Lumnezia, nua ch' el setegn si plirs meins sco caplon tiels plevonts de Vrin e Rumein. Vegnend Spescha in di a Trun per far sias fatschentas, sche vegn el grad da quels ch' el haveva paucs meins avon liberau dad ina segira deportaziun ella Frontscha, infamamein surdaus als Austriaes, che havevan puspei survegnu il surmeun e scatschau ils Franzos ord la Surselva. Tgisaus en pervia d' in priedi sur il text: »Bucca sefidei dils grons de questa tiarra, vid ils quals ei gliei nagin salit,« vegn el malgrad sia difesa manaus naven dals Austriaes sco perschunier ad Innsbruck. Arrivaus leu vegn el plazaus leu ella claustra dils Servits, che han tractau el cun tutta honor. El ha anflau ad Innsbruck gienerala atenziun, stimaus e reverius da tut ses enconoscheuts, utilisav' el las collecziuns scientificas dil marcau, vegnend aschia en relaziun cun celebritads; tras excursiuns ha el empriu d' enconoscher las montagnas dil Tirol, aschia che sia veta ad Innsbruck fuva per el nizeivla e cuntentava el perfetgamein. Suenter 18 meins ein ils deportai vegni mess en libertad. Spescha havess saviu star, mo la carezia per sia patria schav' ad el nagin ruaus ed el ei turnaus anavos en sia claustra, mo ha leu bucc anflau la pasch, ch' el encureva, mo bein novas malemperneivladats e persecuziuns.

El era puspei vegnus tier cudischs e collecziuns e denovamein entscheiv' el a notar sias experiencias, mo quei ha bucca plischiu a ses superiors. Clandestinamein eis ei vegnu priu ord sia combra tractats sur la natira e sur caussas teologicas, per survir tier ina tgisa encunter el. Bucc avunda cun quei; in ha era scomondau ad el sias excursiuns ed imponiu ad el silenzi sur tut quei. Suenter ina greva malsogná en consequenza de tallas — pauc cristianas persecuziuns encurev' el adumbatten de vegnir plevont a Rumein. Finalmein anflein nus el 1809 sco benefiziat a Selva, nua ch' el ha mess ensemen sias fetg intressantas notizias sur il

Tujetsch. 1821 vegn el termess a Trun sco caplon, nua ch' el scriva denter auter sequents plaid: »Sche jeu considereschel nun-partischontamein tut quei ch' jeu hai experimentau en buns e trests dis, sche sai jeu bucc esser en dubi, tgei ha a mi purtau pli gron avantatg, la ventira ne la disgrazia. In um senza calamitads ei in um senza experienza, ed ad in tal um meunca la dretga forza intellectuala — vexatio dat intellectum. — Per mia vart sto' jeu, sch' jeu vi dir la verdat, confessar che las trestas experienzas han purtau a mi pli gronda utilitad che las plascheivlas, havend jeu mo entras las calamitads empriu d' enconoscher pli e pli la sabientscha divina, il proxim e memez. La vera ventira dil carstgeun sin quest mund consista suenter mia perschuasiun, en solidas enconoschienschas, en in bien e seun patertgar ed operar, ed en ina consciencia senza macla.«

Spescha dumbrava bucca meins de 70 onns ed havev' eunc la forza de pecuorer cuolms e glitschès e siu égl possedev' eunc ina forza e clarezia extraordinaria. Eunc 1824 ha el fatg l' emprova ded ir sil Tödi ed ei arrivaus sigl ault denter quel ed il Stockgron.

La quietezza e la resignaziun che sepronunzieschan ord ils plaid pli ad ault citai vegneven buc ord in cor steunchels è mal-seuns, ei eren il product natival ded in spirt pleins harmonia ed ina consciencia intacta. El ha continuau ses studis aschi lunsch sco sias obligaziuns lubevan, percuriu eunc adina las montagnas, mess en scret sias experienzas fatgas, e quei en dubels exemplars, ch' el na surdau ad amitgs, sinaquei ch'ei massen bucc a piarder, ed ha passau, suenter ina veta plein moviment ed adversitads, ses davos onns en beinmeritada pasch. Entuorn igl onn 1830 deva Spescha si il spirt cun inflexibel ruaus e rienta resignaziun: »Ussa dat la baracca ensemen.« — quei ein stai ses davos plaid.

In sa bucc avunda deplorar, che malgrad tutta precauziun ina gronda part de sias scartiras ein idas a piarder. Tgei sort las coll'aziuns dad el fatgas suenter il barschament della claustra han giu, havein nus mai podiu saver. Ina part dils bials minerals che orneschan oz il di il cabinet della scola cantonala, dei vegnir ded el, mo ei meunca dapertut il num e perfin il liug, nua ch' in ha anflau els. Eunc auter ei vegnu en mauns profans. Ei gliei vegnu a nus raquintau sco factum, ch' in zelot hagi barschau las scartiras de Spescha suenter sia mort! (Sin semiglionta per igl extirpatur pauc honorifica moda degien era las poesias de Sur Hansemann de b. m. esser idas a piarder. Ventireivlamein ha il pievel sursilvan giu pli seun giudezi e teniu las bialas canzuns en buna memoria.) Tgei ch' il barschamen de Mustér haveva mess a piarder, ha Spescha, sco el sez deplorescha, mai podiu reparar. Sper tractats sur las sienzas naturalas anflein nus er' ina massa de notizzas historicas, excerptadas ord ovras appartenentas

agl arhiv della claustra, malventireivlamein era distructs dallas flommas; quellas notizzas eran destinadas per ina historia della abbazia de Mustér e dell' entira Surselva.

Havess Spescha mo schau comparer en stampa quei ch' el haveva scret en ses ruasseivels dis a Selva ed a Trun, sche havess siu num senza nagin dubi saviu rivalisar cun quels dils pli perderts umens della Svizzeria e portar honor ed utilidad a sia patria, essend il cantun Grischun e spezialmein la Partsù da gliez temps enconoschi ella Svizzeria schi sco oz il di certas tiarras dell' Asia interiura; las cartas eran schi munglusas, ch' entiras cadeinas de montognas u muncavan, u havevan tut in' outra posiziun, ne gnanc esistevan en verdat. Tgei che Spescha scriva sur glieut e tiarra fuva per biars niev, ed el madem temps giest ed interessant, e quei ei eunc pli fetg ded apprezzar, sch' in patratga che tut quei ch' ei vegnu scret sur il Grischun avon igl enconoschiu Escher, ei absolutamein bucca de duvvar. Era las cartas, luvradas ora da Spescha, e quei senza agid d' instruments, mo suenter igl égl, merettan tut laud. Sias descripziuns dellas contradas remarcablas pella geologia — era en quei rom della scienza ei el en nosa tiarra igl εμπrem — ein bunas, claras e giestas; tut fa ver, che el sesenta cheu da casa. Las descripziuns de ses viadis ed excursiuns muossan a nus igl um, ch' ei seprius en cun olma e tgierp pella caussa e che examinescha tut exactamein. Las montognas ein sia patria, siu legerment, sia poesia; las grevadetgnas ed ils quittaus della veta lai el a quels, che giu el bass semurdregian miserablamein e speculeschan e tuornan a specular; el mira librainein ell' aria pura d' in bi tshiel blau, che sestenda majestusamein sur ils alvs giltchès dellas alps. In ha bess avon ad el, ch' el laschi savens liber quors a sia fantasia a don della verdat, mo quei ha absolutamein nagin fundament. Nus essen, ei gliçi ver, per bia bucca stai en tuts ils logens, che Spescha ha visitau, mo tonaton en biars de quels e nus havein adina anflau sias notizias absolutamein giestas. Senza giest esser botanicher u zoolog, ein sias notizias sur la flura ed il regn animal dellas alps fetg remarcablas e havessan ins bucca sfarlatau sias collecziuns, sche savesasn ins ussa, utilisond quei material, scriver enzitzei pli exact sulla Surselva, che quei ch' ei gliçi pusseivel da present.

Aschia finin nus questa quarta biografia sur il brav e vegl Spescha. Ils eunc vivents amitgs ded el vegnen a nus saver grau, che nus havein encuretgd ded ornar sia fossa cun in simpel tshupi, ed eunc auters considereschon bein cun plascher la figura ded in **um liber** che ha viviu, luvrau e bein era pittiu per la scienza.

La tiarra segi ad el leva leu sut las aultas montognas, nua ch' il giuven Rein salida la tgina della libertad!

